

Il viadi

da Sereina Hendry (versiun scursanida da: AH + BF)

Ei era in bi di da stad baul la damaun. Il cavacristallas Remo sedecida dad ir puspei inaga alla tscherca da siu cletg per encurir bialas cristallas. El ha semtgau ina buna marena, ha tratg en calzers da cuolm, priu il palfier, puntga e mazzot. El camina atras il vitg. Essend pér las sis dorman ils biars aunc. Sulettamein il pasterner ha gia cazzola e traffica en pasternaria. Mond sper la pasternaria ora carmala il bien fried da paunins frestgs ed el splunta vid la finiastra dalla pasternaria. El dat ina cuorta paterlada cul pasterner, cumpra dus paunets aunc tievis e cuntinuescha siu viadi.

El banduna il vitg e la via per cuntinuar siu viadi d'in trutg si viers ils cuolms. El gauda l'aria frestga dalla damaun ed il cant dils utschals. Suenter duas uras contonscha el il liug previu. Igl ei in grep massiv cun ina grossa aveina da quarz. Cheu vul el empruar siu cletg. Gia s'imagina el in terment fuorn cun cristallas preziasas.

Gl'emprem depona el il sacados e beiba in tec te. Beinspert semetta el alla lavur. Remo pren siu palfier ed entscheiva a volver plattas e pitgar cun puntga e mazzot encunter il grep. Pintgas e grondas scalgias seslucan dalla preit crap e schulan dretg e seniester. El siua tut giut.

Tuttenina sedistacca in crap gronds sc'in meil e setschenta el pastg. „Aua“, cloma il crap, „quei cheu ha lu fatg mal!“ Il crap veva viviu dapi milliuns onns en quella preit crap cun sia mumma e ses fargliuns ed ussa schai el in dètg toc naven el pastg, tut persuls. „Jeu vi turnar anavos en miu plaz, jeu vi buca star cheu el pastg“, singlutta il crap e duas larmas roclan dalla vesta giu. Prest encorscha el ch'ei gida nuot da bargir. El mira co Remo petga e cava pli e pli profund viaden el grep. Mintgaton pren Remo in crap ni l'auter enta maun contemplond quel exactamein. Ils biars betta Remo dalla plaunca giu mo beinduras aud'ins in „ah“ ni in „oh“ e lu caveglia el igl anflau spel sacados. Il crap capescha buca propi quei. El ha il fervent giavisch che Remo prendi era el enta maun e deponi el sco tut ils auters spel sacados. Denton Remo fa gnanc stem dil crap.

Tuttenina interrompa il cavacristallas e mira cun bucca e nas dalla tauna viaden. Il crap el pastg emprova da sestender per era puder veser zatgei. Mo el vesa nuot. Remo seruschna dil fuorn viaden e torna suenter ina piazza anora cun ina bellezza cristalla enta maun. El contempla la cristalla encunter il sulegl e dat in gibel dil plascher. Ina bellezza cristalla tarlischa el sulegl. Il crap mira sin sesez e vegn tut trests. „Jeu hai massa urs, cantuns, ruosnas e sun buca neidis e bials sco la cristalla. Jeu tarlischel era buc. Mei pren il cavacristallas buca cun el. Jeu sun buca custeivels avunda.“ E puspei roclan larmas dalla vesta giu. „Tgei duei jeu pomai far uss cheu tut persuls giun plaun?“ El cloma per agid. Forsa audan ses fargliuns ni sia mumma e san gidar el. Ni sun ni tun, nuot!

Havend Remo anflau treis bialas cristallas pachetescha el siu uorden e semetta sin via encunter casa. Remo gnanc fa stem dil crap. El ei aschi contents da sia cattada ch'el scarpetscha bunamein sur il crap. Il crap mira trestamein suenter al cavacristallas. „Mo sch'jeu fuss er ina cristalla – mo sch'jeu tarlischass era aschi fetg – mo sch'il cavacristallas vess priu mei cun el – mo ...“ Staunchels dil bargir sedurmenta il crap.

Ina notg sededesta il crap pervia d'ina termenta ramur. Ei plova sco da derscher cun sadialas. Dretg e seniester sederschan dutgs ramuronts a val e meinan crappa grossa. Tuttenina sdrappa ina bova il crap dalla val giadora. Il crap serocla e fa tgaubrochels, el vegn bess vi e neu. El tema empau perquei ch'el sa buca tgei che succeda cun el. Il crap ei vegnius transportaus en in flum. Leu flessegia l'aua pli plaun ed il crap seferma encunter in terment carpun. Il crap ei staunchels da siu viadi stentus e da tut ils tgaubrochels e sepusond encunter il carpun sedurmenta el beinspert. El dorma stagn e bein e senta buca ch'il carpun vegn neunavon e vesa il crap che sepusava encunter el. Il carpun fa bucca rienta. Vid la fatscha dil pignet vesa el la tema e schenadadad dil pign. Perquei lai il carpun aunc durmir empauet il crap.

Finalmein sededesta il crap. „Buna sera, pignet“, di il carpun cun vusch migeivla. Il crap rispunda schenadamein: „Bu...bu...na se...ra.“ – „Buca hagues tema. Jeu sun il carpun. Ti eis vegnius culla aua gronda dalla plievgia ed eis staus eri cheu encunter mei. Jeu hai plascher da tia viseta. Ti astgas bugen star cheu cun mei.“ Il crap entscheiva a rir da cor pertgei el senta ch'il carpun manegia bein cun el.

Il carpun ed il crap daventan ils megliers amitgs. Els raquantan in a l'auter historias, fan giugs, contemplan l'aua e las plantas. Il pli bugen ha il crap denton, cura ch'il carpun raquenta ad el historias dils pèschs. Il carpun sa denton era raquintar ina massa dils carstgauns, co lezs vivan e nua ch'els habiteschan. El raquenta era dils affons che vegnan a far termagls sper l'aua, bettan crappa ni fan boggn. Las historias dils affons plaian tut aparti al crap. El ha bugen il rir dils affons ed ils giugs ch'els fan. Mintgaton, sche l'aua ei fetg clara e transparenta, ha il crap il cletg da veser ils affons alla riva dil flum. Quei plai e dat buna luna.

Aschia vargan onns ed onns. Tochen in di cura ch'els vegnan disturbai dad ina maschina. Ina termenta maschina entscheiva a furar permiez il carpun. Tut entscheiva a semover ed il crap vul setener cun tutta forza vid il carpun. Mo nunpusseivel. Ils carstgauns vulan baghegiar ina punt dad ina riva a l'autra ed aschia sto il carpun vegnir mess naven. Il crap grescha: „Agid, agid, tgei schabegia cun nus?“ Mo il carpun di cun vusch ruasseivla: „Buca hagues tema, car crap. Ils carstgauns vulan baghegiar in punt per saver ir dad in vitg a l'auter per visitar in l'auter. E nus dus fagein bugen plaz a quella punt. Nus vegnin a ruclar vinavon cul flum. Forsa che ti setschentas en in auter liug.“ Aschia sto el prender cumiau dil carpun.

Aua selvadia transporta il crap lunsch, lunsch vinavon el flum tochen en in lag. Il crap sa immediat nua ch'el ei pertgei ils pèschs, ses buns amitgs, vevan raquintau da differents lags. Il crap emprèn d'enconuscher biars animals ed autra crappa. Savens patratga el vid il carpun e siu cussegl. Aschia raquenta el historias als animals che senodan sper el vi ni er alla crappa che schai entuorn el. Tut las historias ch'el raquenta haveva el udiu dil carpun. Tuttenina entscheiva il crap a raquintar historias novas, historias che vegnan semplamein endamen ad el. Ils animals san star uras ed uras e tedlar co il crap pign raquenta. Ils animals ch'enconuschan il crap raquantan ad auters animals dallas bialas praulas ed historias. Aschia ha il crap adina viseta dad animals che vegnan specialmein tier el per tedlar ina praula ni l'autra. En biars flums e lags ei il crap daventaus enconschents pervia da siu dun da raquintar.

Onns ed onns vargan ed il crap surstat co ses cantuns e sias ruosnas svaneschan tec a tec. El vegn stuschaus dall'aua tochen ch'el arriva finalmein ella mar. Lu vegn ei endamen al crap ch'il carpun haveva raquintau dall'immensa mar. E cheu entaupà el puspei biars auters animals interessants. Era a quels raquenta el sias historias. Il crap mida adina plaz, l'aua transporta el adina puspei en in auter liug.

In di dat ei in grond stemprau. La mar ei fetg malruasseivla. Il crap vegn bess vi e neu. El vegn fiers dallas undas a riva. El schai sin ina biala e liunga riva da palmas, plantas e caglias ch'el enconuscha buc. Il sulegl scaulda ed il crap gauda siu niev contuorn che plai immediat ad el. Era cheu raquenta el sias historiettas al contuorn. E la sera cura che tut ei ruasseivel teidla el il pli bugen la ramur dallas undas e dil vent.

In di vesa il crap da lunsch in affon vegnend pli e pli datier. Il crap entscheiva a tarlischar. Finalmein vesa el in affon. Igl ei ina buoba cun cavels cotschens, liungs e tschuors. Ella ha buna luna e conta ina canzun. O, con bi che quei tuna. Ella vegn pli e pli datier ed il crap po strusch spitgar da veser ella da maneivel. La buoba tila ora ils calzers per ch'els vegnien buca bletschs dallas undas. Ella seferma gest sper il crap. Il crap ha battacor. La buoba mira ora silla mar. Ses eglis brins tarlischan. Tuttenina sbassa ella ils eglis e vesa il crap. Cheu entscheiva sia fatscha a tarlischar. Ella stat en schanuglias e pren il crap enta maun. „Tgei bellezza crap che ti eis. In bi fin e rodund. E lu tgei colurs specialas. Enzatgei aschia hai jeu aunc mai viu.“ Il crap tarlischa dil plascher. Enzatgei aschi bi veva negin aunc detg ad el. La buoba pren il crap en ses mauns e tegn el encunter sia fatscha. Tgei legria pil crap e per la buoba. La buoba arva puspei il maun e mira sil crap. Cheu peglia il crap tema. „Na, buca fiera naven mei!“ Sco sche la buoba vess udiu ses

plaid di ella: „Jeu vi prender a casa tei. Ti plaias aschi bein a mi.“ Ella siara siu maun, tegn ferm il crap e va a casa.

Arrivada a casa va la buoba immediat en sia combra e tschenta il crap sper il letg sin ina cruna. Era el ei aschi custeivels ch'el obtegn in plaz sper la cristalla.